

**Kalaallit eqqumiitsuliaannut nunatta eqqumiitsulianik saqqummersitsiveqalernissaa pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.**

(Inatsisartunut ilaasortaq Múte B. Egede, Inuit Ataqtigiit )

**Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

**Aappassaaneerinnineq**

Naalakkersuisut sinnerlugit Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq qutsavigissavara isumaliutissiissutaat pillugu.

Ataatsimiititaliaq isumaliutissiissummini allannguutissatut siunnersuuteqarpoq imatut nipeqartumik:

"Kalaallit eqqumiitsuliaannut eqqumiitsulianik saqqummersitsiveqalemisnaanut periarfissanik siuarsaanissamut, tassungalugu ilanngullugu avataanit aningaasalersuisoqarnissaata periarfissarsiuunnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut."

Naalakkersuisut maluginiarpaat ataatsimiititaliap isumaqatigiittup siunnersuut akuersissutigisassatut inassutigigaat.

Kalaallit Nunaanni Eqqumiitsulianik Katersugaasiviup Siulersuisuisa siusinnerusukkut Naalakkersuisut qinnuigisimavaat neriorsuutitut allakkiamik nassiussaqaqqullugit, taamaaliorneq aqutissiuussisinnaammat aningaasaateqarfinniit aningaasaliissutinik pissarsisarnissanut, siunissami ingerlatsinissap qularnaarneqarnissaanik kissaateqarnermut atatillugu. Naalakkersuisut neriorsuummik taamaattumik siulersuisunut nassiussaqaarsimapput, taamalu Ataatsimiititaliap inassuteqaataa naammassineqarluni, Naalakkersuisut peqquneqarnissaannut nunatsinni eqqumiitsulianik katersugaasivimmik kalaallit eqqumiitsuliaannut pilersitsinissamut siuarsaanissaq eqqarsaatigalugu.

Naalakkersuisut tamatuma saniatigut maluginiarpaat Ataatsimiititaliap isumaliutissiissutaani ersittoq Namminersorlutik Oqartussat ingerlatsineq 5,8 mio. kr.-it missaannik naleqartoq aningaasalersussagaat. Naalakkersuisut erseqqissaatigissavaat Kommuneqarfik Sermersooq neriorsuuteqareersimammat ingerlatsinermut aningaasalersueqataanissamik, kommunillu neriorsuutaa taanna eqqumiitsulianut katersugaasivissap siulersuisuisa tunissutip ilaatut Naalakkersuisunut nassiussimammassuk.

Taamatut oqaaseqarluta Naalakkersuisut inassutigissavaat ataatsimiititaliap allannguutissatut siunnersuutaa akuersissutigineqassasoq.